



Bosna i Hercegovina
Federacija Bosne i Hercegovine
Tuzlanski kanton
GRAD GRADAČAC

H.K.Građašćevića 54, 76 250 Gradačac, telefon 035-39-750, fax. 035-369-751, e.mail: opc.grad@bih.net.ba, www.gradacac.ba

**Služba za društvene djelatnosti
i boračko-invalidsku zaštitu**

I N F O R M A C I J A
o stanju sporta na području grada Gradačac

Gradačac, juli 2020.godine

Zakon o sportu Tuzlanskog kantona stupio je na snagu 31.05.2010.godine («Sl. novine TK» broj 8/10 i 8/13).Prema ovom zakonu **sportski odgoj i obrazovanje** obuhvata tjelesne i sportske aktivnosti djece, omladine i odraslih građana. Sportski odgoj i obrazovanje ostvaruje se u okviru nastavnih planova i programa predškolskih ustanova, osnovnih i srednjih škola kao i u okviru programa sportskih klubova.

Sport, u smislu ovog zakona, obuhvata:

- organizovanje tjelesne aktivnosti djece, omladine i odraslih građana, koje se ostvaruju u okviru stručno vođenog tjelesnog vježbanja i sportskog treninga;
- posebno organizovane tjelesne aktivnosti u igri radi postizanja sportskih dostignuća, koja se postižu prema utvrđenim takmičarskim pravilima, u oblasti sporta za lica sa invaliditetom, kvalitetnog sporta i vrhunskog sporta;
- sportska takmičenja i priredbe;
- stručne poslove lica koja planiraju, organizuju i vode sportske aktivnosti te pripremaju druga lica za učešće na sportskim takmičenjima.

Sportska rekreacija obuhvata organizovane ili individualne sportske aktivnosti djece, omladine i odraslih građana koje se ostvaruju u okviru različitih oblika tjelesnog vježbanja i nemaju organizovane takmičarske oblike.

Kvalitetan sport je priprema i takmičenje sportista po unaprijed utvrđenom sistemu i pravilima takmičenja koje se organizuje na području dva ili više kantona, na prostoru Federacije BiH ili na cijelom prostoru Bosne i Hercegovine.

Vrhunski sport je priprema i takmičenje sportista koji su po svojim rezultatima postali članovi državne selekcije BiH ili su pojedinačno postigli vrhunske rezultate po međunarodnim normama u odgovarajućoj disciplini.

Sport za lica sa invaliditetom je sportska aktivnost u okviru koje se licima sa invaliditetom obezbjeđuje jednake mogućnosti za organizovano bavljenje sportom i sportskom rekreacijom.

Grad ostvaruje javni interes u sportu stvaranjem uslova za zadovoljavanje lokalnih potreba građana u oblasti sporta i sportske rekreacije tako što:

- programira i planira razvoj sporta i sportske rekreacije na području grada;
- obezbjeđuje sredstva za ostvarivanje gradskog sportskog programa;
- podstiče i obezbjeđuje uslove za odvijanje i razvoj sporta na području grada;
- planira, izgrađuje, održava i kontroliše namjensko korištenje javnih objekata za sport i sportsku rekreaciju na području grada.

Sportsku djelatnost obavljaju sportski klubovi, sportska društva, sportski savezi, udruženja za sportsku rekreaciju, privredna društva i fizička lica samostalnim radom.

Sportski savez grada Gradačac afirmiše sistem sportske kulture kroz sportski odgoj i obrazovanje, sport i sportsku rekreaciju od sportske aktivnosti djece, omladine i odraslih građana, koji se organizuju na načelu jednake dostupnosti svim građanima bez obzira na pol, nacionalnost, vjeroispovijest, političko uvjerenje ili porijeklo, isključujući diskriminaciju po bilo kom osnovu. Posebna pažnja se posvećuje sportu:

- u školi,
- kvalitetnom sportu i
- sportu za lica sa invaliditetom.

Sportska takmičenja i priredbe, te planiranje i organizovanje sportskih aktivnosti na području grada Gradačac ostvaruju se kroz aktivnosti Gradskog nogometnog saveza Gradačac, koji okuplja nogometne klubove sa područja grada Gradačac i Sportskog saveza grada Gradačac, koji okuplja klubove iz ostalih sportova: rukometa, odbojke, košarke za lica sa invaliditetom, karate sporta, sportskog ribolova, šaha, streljaštva i drugih koji su zastupljeni na području grada Gradačac.

Pored navedenog, Sportski savez grada Gradačac u saradnji sa osnovnim i srednjim školama sa područja grada Gradačac, planira, organizuje i sprovodi sportske programe iz atletike, masovnog sporta i sportskih igara.

JAVNI INTERES DRUŠTVA U OBLASTI SPORTA

Javni interes društva u oblasti sporta na području grada Gradačac obezbjeđuju i provode gradske službe preko Sportskog saveza grada Gradačac, Gradskog nogometnog saveza Gradačac, klubova i mjesnih zajednica. Sredstva za ostvarivanje javnog interesa u oblasti sporta obezbjeđuju se u budžetu grada. Javni interes u oblasti sporta na području grada Gradačac obuhvata:

- tjelesne aktivnosti i sportske igre koje se organizuju u cilju unapređenja zdravlja djece i omladine,
- sportski odgoj i obrazovanje,
- sport za lica sa invaliditetom,
- sportske klubove gradskog i kantonalnog ranga takmičenja,
- sportske klubove kvalitetnog sporta i
- sportsku rekreaciju.

Aktivnosti grada Gradačac i Sportskog saveza kojima se obezbjeđuje i provodi javni interes društva u oblasti sporta su:

TJELESNE AKTIVNOSTI I SPORTSKE IGRE KOJE SE ORGANIZUJU U CILJU UNAPREĐENJA ZDRAVLJA DJECE I OMLADINE

Tjelesne aktivnosti i sportske igre kojima se unapređuje zdravlje djece i omladine obuhvaćene su godišnjim Programom rada Sportskog saveza grada Gradačac.

Iz Programa rada Sportskog saveza za 2019. godinu realizovane su sljedeće sportske manifestacije:

- manifestacija „Izbor sportiste godine Gradačac 2019“
- gradska sportska takmičenja u odbojci, košarci, rukometu, atletici, malom nogometu, šahu i stolnom tenisu za učenike i učenice osnovnih i srednjih škola;

Svakako u narednom periodu potrebno je planirati izgradnju kvalitetne atletske staze na gradskom stadionu čime bi se stvorili adekvatni uslovi za pripreme sportaša kao i za takmičenja u atletici. Gradska školska takmičenja u sportskim igrama (odbojka, košarka, rukomet, nogomet, atletiku, šah i stolni tenis) održana su prema programu za 2019. godinu u školskim salama, sportskoj dvorani u Gradačcu, te sportskom poligonu „Luke“ u Gradačcu .

Komisija za vrednovanje sportskih rezultata gradskih i kantonalnih takmičenja osnovnih i srednjih škola izvršila je uvid u sva takmičenja koja su održana u 2019. godini i izvršila bodovanje postignutih rezultata, kako plasmana škola, tako i pedagoga tjelesnog odgoja. Najuspješnija osnovna škola u sportskim rezultatima bila je osnovna škola „Ivan Goran Kovačić“ Gradačac, dok je od srednjih škola uspješnija bila Mješovita srednja škola „Hasan Kikić“

Gradačac. Za najsupješnijeg pedagoga tjelesnog odgoja za 2019.godinu proglašen je profesor Denis Begović. Imenovani su na proglašenju sportiste godine za 2019. godinu javno pohvaljeni i istima su uručena odgovarajuća priznanja za postignute rezultate u sportu u 2019.godini.

SPORTSKI ODGOJ I OBRAZOVANJE

Sportski odgoj i obrazovanje ostvaruju se u okviru nastavnih planova i programa predškolskih ustanova, osnovnih i srednjih škola, programa Sportskog saveza i u okviru programa sportskih klubova u mjesnim zajednicama. Važno je napomenuti, da je aktivnost sportskih klubova u mjesnim zajednicama dosta manjkava iz razloga nedostatka stručnih sportskih trenera. U većini klubova po mjesnim zajednicama uloge trenera, vaspitača sprovode igrači na zalasku sportske karijere, bez valjane obuke i stručnog obrazovanja za ovaj poziv.

U tom smislu bilo bi neophodno da se u narednoj godini obavi stručno osposobljavanje sportskih trenera iz različitih sportskih disciplina.

SPORT ZA LICA SA INVALIDITETOM

Sport za lica sa invaliditetom predstavlja sportsku aktivnost u obliku koje se licima sa invaliditetom obezbjeđuju uslovi za organizovano bavljenje sportom i sportskom rekreacijom. Košarkaški invalidski klub «Zmaj» Gradačac okuplja sportiste invalide koji se bave košarkom u kolicima. Važno je napomenuti da je ovo vrlo uspješan sportski klub koji u svojim redovima ima nekoliko reprezentativaca BiH kao i selektora reprezentacije BiH Edisa Imširovića.

Obzirom da se ovaj klub takmiči u najvišem rangu u BiH i da često učestvuje na međunarodnim takmičenjima, pored sredstava koja su predviđena budžetom grada, neophodna je i pomoć kantona kao i naših privrednika.

SPORTSKI KLUBOVI KANTONALNOG RANGA TAKMIČENJA

Na području Grada Gradačac aktivno djeluje najviše nogometnih klubova koji su uključeni u kantonalna takmičenja. U Prvoj kantonalnoj ligi takmiči se jedan klub, Nogometni klub „Omladinac“ Mionica II, dok se u Prvoj županijskoj nogometnoj ligi Posavine takmiči Fudbalski klub „Mladost“ Sibovac.

Prva kantonalna nogometna liga:

Nogometni klub «Omladinac '68» Mionica II

Klub se uspješno takmiči u Prvoj ligi Tuzlanskog kantona, te je sezonu 2019/20. završio na 10. mjestu. Teren i klupske prostorije su potpuno uređene i sastoje se od svlačionica za igrače i sudije, prostorije ekonomata, kancelarije kao i prostorije za održavanje sastanaka i druženje, tribine i postavljenih sjedalica. Teren je u jako dobrom stanju i kompletan stadion je jedan od najkvalitetnijih na području Grada Gradačac.



Fudbalski klub «Mladost» Sibovac (Prva županijska nogometna liga Posavine)

FK „Mladost“ se takmiči u Prvoj županijskoj ligi Orašje gdje postiže dobre rezultate. Zbog neorganizovanog rada sa mlađim kategorijama evidentan je nedostatak igračkog kadra. Ovaj sportski kolektiv posjeduje dva terena, glavni i pomoćni. Redovno se održavaju i u jako dobrom su stanju.



Druga kantonalna nogometna liga:

U Drugoj kantonalnoj nogometnoj ligi je *osam klubova* : FK „Jedinstvo 1952“ Vučkovci, OFK „Vida“ Vida I, NK „12.Decembar“ Rajska, NK „Biberovo Polje“, NK „Trebeva“ Zelinja Donja, OFK „Međida“ Međida Donja, FK „Sloboda“ Kerep, NK „Željezničar“ Jelovče Selo.

Fudbalski klub „Jedinstvo 1952“ Vučkovci

U sezoni 2019/20 klub se takmičio u Drugoj kantonalnoj ligi. Sezonu su završili na prvom mjestu, te će od sljedeće godine nastupati u Prvoj ligi Tuzlanskog kantona. Teren i svlačionice se konstantno dograđuju i uređuju, te se pružaju dobri uslovi za trenažni proces i takmičenje svih selekcija u klubu. Ugrađene su i plastične stolice. Teren za igru je jako dobar, trava u odličnom stanju i sasvim sigurno će FK „Jedinstvo 1952“ biti dostojan domaćin svojim sportskim rivalima u višem rangu takmičenja kojeg su izborili.



Omladinski fudbalski klub «Vida» Vida I

Seniorska ekipa ovog kluba bilježi dobre rezultate u II kantonalnoj ligi. Omladinska ekipa nije aktivna. Na terenu i svlačionicama je dosta urađeno tako da su stvoreni dobri uslovi za rad i takmičenje. Kvalitetno je riješeno navodnjavanje terena koje je neophodno u ljetnim mjesecima. Sezonu 2019/20. su završili na 11. mjestu.



Nogometni klub «12 decembar» Rajska

Klub se takmiči u Drugoj kantonalnoj nogometnoj ligi TK i prethodnu sezonu su završili na 9. mjestu. Teren nije u najboljem stanju i ispunjava minimalne uslove za igru. Rad sa mlađim kategorijama je zapostavljen već nekoliko godina.



Nogometni klub «Biberovo Polje» Biberovo Polje

Klub se takmiči u drugoj kantonalnoj ligi TK i bilježi solidne rezultate. Rad sa omladinskom ekipom je bio dobar dok je funkcionisala općinska omladinska liga. Teren i svlačionice su u jako dobrom stanju i pružaju dobre uslove za rad i takmičenje. Ekipa je sezonu 2019/20. završila na 10. mjestu.



Nogometni klub «Trebava» Zelinja Donja

Član je Druge kantonalne nogometne lige TK. Sportski radnici i simpatizeri ovog kluba u proteklom periodu dosta su uradili i još rade na uređenju igrališta i svlačionica. Teren je dosta dobar. Također mnogo polažu i u rad sa omladinskim pogonima gdje broje 50-ak članova, uzrasta od 9 do 16 godina.

Omladinski fudbalski klub „Mediđa» Donja“ Mediđa

OFK „Mediđa“ je jedan od klubova sa dužom tradicijom i dobrim rezultatima. Teren i prostorije za igrače su u dobrom stanju. Klub se takmiči u Drugoj ligi TK i posljednju završenu sezonu su okončali na 5. mjestu.



Fudbalski klub «Sloboda» Kerep

Klub je član Druge nogometne lige TK. Nakon izgradnje dobrih klupskih prostorija izvršeni su radovi i na poboljšanju terena za igru koji je sada u dobrom stanju sa propisanim dimenzijama. Seniorska ekipa bilježi dobre rezultate. Omladinska ekipa je prestala sa takmičenjem kada je Nogometni savez općine Gradačac prestao sa organiziranjem općinske omladinske lige Gradačac. Posljednju sezonu ovaj tim je završio na 8. poziciji



Nogometni klub «Željezničar» Jelovče Selo

Nogometni klub „Željezničar“ Jelovče Selo se takmiči u Drugoj kantonalnoj ligi TK sa dobrim uspjehom, a sezonu 2019/20. su završili ko šestoplasirana ekipa. Teren i klupske prostorije su u jako dobrom stanju i redovno se održavaju, što pruža kvalitetno treniranje i odigravanje utakmica lokalnog kluba.



Treća kantonalna nogometna liga:

OFK «Mionica 85» Mionica I

Klub se takmiči u 3. kantonalnoj ligi i posljednju sezonu su završili na 2.mjestu. U posljednjih nekoliko godina konstantno se radi na unapređenju infrastrukture stadiona, a trenutno je u toku jedno sveobuhvatno renoviranje terena, koji će nakon završetka radova biti u odličnom stanju. Omladinska selekcija ovog kluba je prestala sa radom, kao i ostale selekcije na našem području iz naprijed navedenih razloga.



NK „Zelinja 76“Zelinja Donja

Ovaj klub je najmlađi nogometni klub na području grada Gradačac i takmiči se u Trećoj kantonalnoj ligi. Sezonu 2019/20. završili su na 7.poziciji.



OSTALI SPORTSKI KLUBOVI

Klub borilačkih sportova „Zmaj“ Gradačac

KBS „Zmaj“ je okupio dosta djece i omladine raznog uzrasta, kao i takmičare u seniorskoj konkurenciji. Postigli su značajne rezultate, kako na domaćoj sceni, tako i po raznim turnirima i prvenstvima u inostranstvu. Članovi ovog kluba redovno dobivaju priznanja na izboru sportiste godine u Gradačcu i šire i najuspješniji su borilački klub na području Gradačca već duži niz godina. Trener ovog kluba Asmir Jahić je na izboru sportiste godine za 2019. godinu proglašen najuspješnijim trenerom grada Gradačac u pojedinačnim sportovima.

Planinarsko sportsko društvo „Gradina“ Gradačac

Ovo sportsko udruženje je osnovano 2004. godine. Okuplja članove svih uzrasta koji se žele baviti planinarstvom. Ostvarili su vrlo uspješni saradnju sa srodnim društvima u regionu. Izgradili

su na Jasenici planinarski dom sa kvalitetnim smještajem(sobe i apartmani). Trenutno koriste kancelariju Sportskog saveza za rad.

Škola nogometa „Tempo“ Gradačac

Škola nogometa „Tempo“ osnovana je 2011. godine i zahvaljujući vrijednim sportskim radnicima i trenerima do sada je postigla vrlo značajne rezultate u takmičenju na kantonu i šire. Učestvuju na raznim međunarodnim i domaćim takmičenjima i redovno ostvaruju zapažene rezultate. Izgradili su nogometni teren u Vidi I na stadionu „Popovača“, koji su dobili na upravljanje i kojeg redovno održavaju, te time stiču odlične uslove za rad ove nogometne škole. Više puta su proglašeni za najuspješniju sportsku školu u Gradačcu, pa tako i na zadnjem Izboru sportiste godine za 2019. godinu.



Karate klub „Tempo“ Medida Donja

Ovaj klub je osnovan 2013. godine i do sada je postigao dobre rezultate u radu i djelovanju. Kao i ostali klubovi iz ove grane sporta, učesnici su raznih takmičenja na općini, kantonu i šire. U 2019. godini napravili su najbolje rezultate od svog postojanja, gdje se najviše istakao njihov takmičar, junior Sadin Mulahalilović, reprezentativac BiH, prvak BiH, prvak balkana. Nastupao je i na Svjetskom prvenstvu u Čileu, gdje je izborio plasman u osminu finala, odnosno plasman između 9. i 16. mjesta. Po zvaničnoj rang listi Svjetske karate federacije Sadin spada u TOP 10 najboljih juniora na svijetu. U 2019. godini je proglašen i jednim od tri najbolja juniora Tuzlanskog kantona.

Sportski tiplerski klub „Zmaj“ Gradačac

Ovo sportsko udruženje osnovano je sredinom 2014. godine. Osnovna djelatnost ovog kluba je popularizacija i unapređenje gajenja sportskih golubova rase Engleski tipler. Za vrlo kratko vrijeme postigli su dobre rezultate i osnovali Bosanko-hercegovačku tiplersku uniju sa sjedištem u Gradačcu.

Udruženje građana sportskih ribolovaca «Hazna» Gradačac

UGSR „Hazna“ okuplja sportske ribolovce sa područja grada Gradačac i uključeno je u kantonalna, državna i međunarodna takmičenja koja se povremeno organizuju. U 2019. godini članovi ovog udruženja su postali prvaci Federacije i prvaci Bosne i Hercegovine u sportskom ribolovu na šarana i amura, čime su stekli pravo učešća na Svjetskom prvenstvu u Ukrajni kao jedini predstavnik BiH.

Streljački klub „Centar“ Gradačac

Ovaj klub egzistira od 2010. godine i jedini je streljački klub na području grada Gradačac. Uspješno se takmiče u kantonalnoj ligi. Član je i Federalne lige BiH, ali zbog nedostatka finansijskih sredstava ne takmiče se u tom rangu natjecanja. Sjedište kluba je na adresi Žrtava genocida Srebrenice bb, Gradačac.

Kung fu wu shu klub „Pesnica od Bosne“

Ovaj borilački klub je osnovan 2008. godine a intenzivnije na gradačačkoj sportskoj sceni se pojavljuje od 2015. godine. Klub nastupa na raznim turnirima, kako domaćim tako i inostranim.

U 2019. godini klub je imao zapažene rezultate a takmičar ovog kluba Anes Bilajac na manifestaciji Izbor sportiste godine 2019. je proglašen za najuspješnijeg seniora u pojedinačnim sportovima.

KVALITETNI SPORT

Kvalitetni sport predstavlja pripremu i takmičenje sportista po unaprijed utvrđenom sistemu i pravilima takmičenja koja se organizuju na području dva ili više kantona, na prostoru Federacije BiH ili na cijelom prostoru BiH. Na području Grada Gradačac djeluju sljedeći sportski klubovi:

Odbojkaški klub « Kula-Gradačac» Gradačac

Ovaj sportski klub okuplja samo žensku populaciju od najmlađeg do seniorskog uzrasta. Treba napomenuti da je ovaj klub i jedan od najuspješnijih klubova na našem području, kako po organizaciji tako i po rezultatima koje je postigao u proteklom periodu, jer već dugi niz godina nastupaju u najvišem rangu takmičenja, Premijer ligi BiH za odbojkašice. Rezultati seniorske ekipe su postignuti i zahvaljujući vrlo uspješnom radu sa mlađim selekcijama. Na posljednjoj manifestaciji „Izbor sportsiste Gradačac 2019“ godine ponijeli su titulu kao najuspješnija seniorska ekipa u 2019. godini. Posljednju sezonu 2019/20. završili su na 9. poziciji.

Rukometni klub «Gradačac» Gradačac

Rukometni klub „Gradačac 1954“ se trenutno takmiči u 1. Ligi F BiH, gdje ostvaruje zapažene rezultate te ide prema tome da rukomet u Gradačcu vrati na nivo kada je klub bio učesnik evropskih kupova i jedan od najjačih klubova u Premijer Ligi BiH. Upravni odbor kluba koji je sačinjen od mladih i ambicioznih osoba, ciljeve kluba ostvaruje kroz potenciranje mladih i domaćih igrača što je jedan od prioriteta kluba. Klub trenutno ima roster od 25 igrača od kojih je 80 % iz Gradačca. Važnost ovakvog projekta za lokalnu zajednicu prepoznali su i stanovnici Gradačca koji u sve većem broju dolaze na utakmice kluba. Od 2019- te godine u sklopu Rukometnog kluba „Gradačac 1954“ oformljena je i škola rukometa čije se selekcije takmiče u omladinskoj ligi, kao i na državnim i međunarodnim turnirima. Sezonu 2019/2020 Rukometni klub „ Gradačac 1954 “ je završio na 3. mjestu čime su ostvareni postavljeni ciljevi. Cilj Rukometnog kluba „Gradačac 1954“ za sezonu 2020/2021. jeste boraba za ulazak u Premijer ligu BiH.

PRIHODI za 2019 godinu : Grad Gradačac 50.000,00 KM i Donatori/Sponzori 15.480,00 KM

Za realizaciju postavljenih ciljeva Rukometnog kluba „Gradačac 1954“ u 2020-toj godini potrebno je 89.590,00 KM.

Grad Gradačac60.000,00 KM

Donatori/Sponzori29.590,00 KM

Na Manifestaciji „Izbor sportiste godine Gradačac 2019“ proglašeni su za drugoplasiranu seniorku ekipu na području Grada Gradačac, a igrač ovog kluba, Fatmir Sarajlić, na manifestaciji Izbor sportiste godine „Gradačac 2019“ proglašen je za sportistu godine u Gradačcu.

Nogometni klub «Zvijezda-Gradačac» Gradačac

Nogometni klub «Zvijezda-Gradačac» Gradačac je sportski kolektiv sa najdužom tradicijom u gradu Gradačac i sigurno je najmasovniji sportski kolektiv na našem području. Osnovan je davne 1922.godine.Važno je napomenuti da tri mlađe selekcije: pioniri, kadeti i juniori imaju oko 150 aktivnih mladih sportista. Klub se trenutno takmiči u Prvoj federalnoj ligi i na kraju sezone 2019/20. zauzeli su 9.mjesto na tabeli.

Pored glavnog terena u sklopu ovog kompleksa se nalazi i pomoćni teren te je u fazi izgradnje i teren sa umjetnom travom.

Rezultati rada na infrastrukturi su svakako vidljivi jer kompleks gradskog stadiona „Banja Ilidža“ u Gradačcu već sada poprma respektabilnu sliku.

U predhodnih deset godina za NK „Zvijezda-Gradačac“ iz gradskog budžeta odobravani su sljedeći iznosi:

Godina	Iznos u KM
2010	70.000
2011	63.000
2012	1.000
2013	70.000
2014	99.000
2015	201.700
2016	193.500
2017	180.000
2018	204.700
2019	214.00
2020	70.000 uplaćeno sa šestim mjesecom

NK „Zvijezda –Gradačac“ je dostavila budžetski zahtjev za 2020 godinu u iznosu od 240.000 ,oo KM a za sezonu 2020/21 godina iznos od 270.00,oo KM a planirani budžet NK „Zvijezda-Gradačac „ za navedenu sezonu je 431.000,oo KM što znači da planiraju od donacija i drugih izvora finansiranja obezbijediti još 161000,oo KM.

Trenutne neizmirene obaveze Kluba su:

- obaveze prema poreznoj uprav Federacije BiH.....1.323.520,oo KM
 - obaveze prema izvršnim sudskim presudama.....136.032,85 KM
 - tekuće neizmirene obaveze iz 2020.godine.....31.000,oo KM
- UKUPNO:.....1.490.553,39 KM

Klub trenutno zbog blokade računa finansijske transakcije vrši preko FK Zvijezda 1922.



Fudbalski klub «Bosna» Mionica III

Ovaj klub se takmiči u Drugoj nogometnoj ligi FBiH. Posljednju sezonu su završili na visokom 4. mjestu i sasvim sigurno da ovaj klub u narednom periodu ima kapacitete da se domogne višeg ranga takmičenja odnosno 1. lige FBiH. Uporedo sa takmičarskim rezultatima radi se na renoviranju i uređenju nogometnog terena i svlačionica. Na stadionu „Jezero“ trenutno se izvode radovi na proširivanju službenih prostorija. Također, prije desetak godina izgrađena je dobra tribina na južnoj strani stadiona. Rad sa mlađim uzrastima je dobar kroz školu fudbala. Teren ovog stadiona je u jako dobrom stanju.



KOŠARKAŠKI INVALIDSKI KLUB „ZMAJ“ GRADAČAC

U takmičarskoj sezoni 2018/19 i jesenji dio 2019/20 KIK „Zmaj“ Gradačac je ostvario izuzetne rezultate i to:

- 3. mjesto Premijer lige BiH
- 2. mjesto u KUP-u F BiH;
- ostvarenim rezultatom obezbijedili smo učešće u Regionalnoj NLB Wheel ligi za sezonu 2019/2020,
- 3. mjesto u EURO Ligi -Lođ (Poljska)
- KIK „Zmaj“ Gradačac ostvario direktan plasman u EURO Ligu za 2020. godinu, Solun
- 5. mjesto u NLB Wheel ligi, koju čine klubovi iz BiH, Italije, Austrije, Slovenije, Hrvatske i Srbije;

- 2. mjesto na Međunarodnom turniru „Bljesak“ Slavonski Brod
- 3. mjesto na Međunarodnom turniru „Parabasket Maribo 2019“
- 1. mjesto na Međunarodnom turniru „Sana“ Sanski Most
- 1. mjesto na Međunarodnom turniru „Bijeljina 2019“
- KIK „Zmaj“ Gradačac daje četiri igrača, selektora i trenera u Reprezentaciju BiH Igrači Kluba i stručno osoblje su dali nemjerljiv doprinos uspjehu našeg Nacionalnog tima na Evropskom prvenstvu u Sarajevu a trenutno se obavljaju organizacione pripreme za učešće Reprezentacije BiH na Evropskom prvenstvu za 2020. godine.

SPORTSKA REKREACIJA GRAĐANA

Sportska rekreacija obuhvata organizovane ili individualne sportske aktivnosti omladine i odraslih građana, koja se ostvaruje u okviru različitih oblika tjelesnog vježbanja i nema određene takmičarske oblike.

Na području grada Gradačac sportska rekreacija se odvija uglavnom samoorganizovanjem manjih grupa odraslih građana muškog pola u sportskoj dvorani, kao i na vanjskim sportskim terenima na cijelom području grada Gradačac. U posljednjih nekoliko godina primjetan je povećan broj rekreativaca, djece, omladine i odraslih, koji upražnjavaju trčanje i biciklizam kao vid rekreacije, a također osjetan je i porast građana koji treniranjem u fitness centrima zadovoljavaju svoje sportsko-rekreativne potrebe.

Sportska rekreacija za žensku populaciju za sve uzraste, kroz razna aerobik i fitnes vježbanja je ponovo aktivirana. Kao i kod muške populacije i u ženskoj je u posljednje vrijeme prisutno povećana sportsko-rekreativna aktivnost, naročito kroz vožnju bicikla i trčanje. Također, sve veći broj ženske populacije upražnjava vježbanje u fitness centrima, kojih je sve više u Gradačcu. Smatramo da ovom segmentu sportske rekreacije treba posvetiti još više pažnje i pomoći ga sa finansijskim sredstvima i kroz obezbjeđenje još adekvatnog prostora za vježbanje.

OSTVARIVANJE JAVNOG INTERESA U SPORTU

Grad Gradačac direktno i putem Sportskog saveza grada Gradačac ostvaruje javni interes u sportu stvaranjem uslova za zadovoljavanje lokalnih potreba građana u oblasti sporta i sportske rekreacije tako što:

- a) programira i planira razvoj sporta i sportske rekreacije na području Grada na prijedlog Sportskog saveza, sportskih klubova i građana,
- b) podstiče i obezbjeđuje uslove za odvijanje i razvoj sporta na području grada Gradačac,

- c) planira, izgrađuje, održava i kontrolira namjensko korištenje javnih objekata za sport i sportsku rekreaciju na području Grada,
- d) obezbjeđuje sredstva za ostvarivanje gradskog sportskog programa.

a) Program razvoja sporta u narednom periodu treba usmjeriti ka:

I. Aktivnostima koje uključuju sportsko angažovanje najvećeg broja populacije, takozvani masovni sport. U tom cilju neophodno je:

- nastaviti sa organizovanjem i dopuniti program održavanja sportskih priredbi masovnog karaktera, kao što su: ulične trke, krosemi, takmičenja po školama u sportskim igrama, atletskim disciplinama i drugo. U klubovima još više aktivirati i organizovati specijalizovane škole za najmlađe po sportskim igrama (škola nogometa, škola rukometa, škola košarke, škola odbojke i slično).

- sportskoj rekreaciji odraslih građana do sada se nije pridavala posebna pažnja. Zbog toga bi bilo neophodno u narednom periodu omasoviti sportsku rekreaciju izgradnjom atletske staze na gradskom stadionu i obezbijediti termine za vježbanje u sportskoj dvorani u Gradačcu, te stručno usmjeriti razna fitness vježbanja, kao što su aerobik, teretana i razni plesni programi. Renoviranjem parka Stara Banja i postavljanjem fitness sprava za vježbanje u isti primjetan je osjetan broj rekreativaca muške i ženske populacije, odnosno djece, omladine i odraslih, koji koriste pomenuti park u svrhu rekreacije. Pored rekreativaca u pomenutom parku i pojedini klubovi obavljaju svoje fizičke pripreme, što sve zajedno daje jednu lijepu sportsku sliku. Prijedlog je da se na području Grada Gradačac izgrade biciklistička staza i staza za trkače, negdje u prirodi, a pogodan teren za to bi mogao biti pojas oko jezera „Vidara“, jer u Gradu gotovo da i ne postoji duža staza za trkače ili šetače sa mekšom podlogom. Zatim, da se uradi sve što je potrebno da se pročisti voda u naša dva jezera „Hazna“ i „Vidara“, da bi što veći broj populacije koristio plivanje kao vid rekreacije. Također, dobro bi bilo da se u dogledno vrijeme na području Grada Gradačac izgradi bazen, jer postojeći koji imamo u sklopu hotela „Banja Ilidža“ je više predviđen za rehabilitaciju korisnika pomenutog hotela, nego za sportsku rekreaciju građana Gradačca.

2. Nakon stručne procjene kvaliteta i realnih potreba Grada pomoći onaj sportski klub iz kvalitetnog sporta koji najviše pokazuje i obećava.

b) Podsticaj i obezbjeđenje uslova za odvijanje i razvoj sporta

Javni interes u oblasti sporta Grad ostvaruje i kroz podsticaj i obezbjeđenje uslova za odvijanje i razvoj sporta na svom području. U tom smislu predlažemo da se pomogne onim sportskim klubovima i onim sredinama, koji su nabrojani u ovom izvještaju, a koji su već uložili određena sredstva u sportske objekte.

c) Planiranje, izgradnja, održavanje i kontrola namjenskog korištenja javnih objekata za sport i sportsku rekreaciju

Gradski sportski program u pogledu planiranja, izgradnje, održavanja i kontrole namjenskog korištenja javnih objekata za sport i sportsku rekreaciju nije urađen. Predlagač treba da bude Sportski savez grada Gradačac a isti treba da odobri gradonačelnik grada i gradsko vijeće grada Gradačac. Na osnovu tog programa treba vršiti planiranje, izgradnju, korištenje i održavanje javnih sportskih objekata na području cijelog grada. Ovaj izvještaj sadrži i podatke o svim sportskim objektima na području grada Gradačac, to jest njihovom trenutnom stanju i prijedlozima neophodnih mjera za uređenje istih u narednom periodu. Ovi podaci su dobra polazna osnova da se u narednom periodu planiraju sve neophodne radnje da bi izgradnja sportskih objekata bila ravnomjerna na čitavoj teritoriji grada, odnosno da posluži u izradi Programa razvoja sporta u gradu Gradačac.

Mjesna zajednica Vida II

U ovoj mjesnoj zajednici postoje klupske prostorije u okviru društvenog doma ali ne postoji nogometni klub niti je izražena želja mještana za osnivanjem istog i uređenjem prostorija. Teren je dobar i koristi se za održavanje treninga pojedinih sportskih kolektiva sa područja grada Gradačac kao i za rekreaciju omladine i odraslih.



Mjesna zajednica Ledenice Gornje

U 2016-oj godini u ovoj mjesnoj zajednici je sredstvima općine Gradačac u iznosu od **31.142,54 KM** izgrađen sportski poligon. On je trenutno u jako dobrom stanju, održava se redovno i služi za sport i rekreaciju omladine i odraslih.



Mjesna zajednica Ledenice Donje

Prije rata je ovaj teren bio veoma dobar tako da je jedno vrijeme i gradačačka „Zvijezda“ odigravala svoje utakmice na njemu. Na žalost tokom proteklog rata klupske i društvene prostorije su devastirane a i sam teren je pretrpio veća oštećenja. Društveni dom je renoviran, redovno se održava i u jako dobrom je stanju.



Mjesna zajednica Škorići

Ova MZ posjeduje, nakon sportskog poligona u samom centru grada, sasvim sigurno najljepši sportski poligon na području grada Gradačac. Izgrađen je 2016. godine sredstvima općine Gradačac u iznosu od **90.000,00 KM**. Teren je osvijetljen, ograđen i koriste ga u velikoj mjeri kako mještani lokalne mjesne zajednice tako i okolnih. Pogodan je za kvalitetnu organizaciju raznih sportskih manifestacija i turnira.



Mjesna zajednica Vida I – Osnovna škola „Hasan Kikić“

U krugu Osnovne škole „Hasan Kikić“ sredstvima ino-donatora, kroz projekat GAP-a i sufinansiranjem općine izgrađen je kvalitetan sportski poligon koji koriste prije svega učenici škole ali u velikom broju i mještani ove mjesne zajednice.

Uz školu se nalazi i prostor za izgradnju sportske dvorane koja je neophodna za izvođenje nastave tjelesnog odgoja učenika ove škole.



Mjesna zajednica Okanovići

Sredstvima iz budžeta općine Gradačac, u iznosu od **34.829,73 KM** 2016. godine je izgrađen sportski poligon u ovoj mjesnoj zajednici. Osvijetljen je, kvalitetno ograđen i redovno održavan od strane mještana mjesne zajednice.



Mjesna zajednica Novaliči-područna škola „Hasan Kikić“

U ovoj mjesnoj zajednici je izgrađen poligon, a nakon toga postavljena je rasvjeta i dječji poligon. Sve se održava redovno, izgleda jako lijepo, te ovaj sportski poligon pruža mogućnost održavanja sportskih dešavanja kako školaraca, tako i rekreativaca.



Mjesna zajednica Rajska-područna škola „Hasan Kikić“

Sredstvima federalne vlade i općine Gradačac izgrađen je jedan od najkvalitetnijih sportskih poligona u Gradačcu, koji pruža mogućnost djeci i svim mještanima ove mjesne zajednice da upotpune svoje slobodno vrijeme kroz razne sportove.



Mjesna zajednica Mionica III – područna škola „Dr.Safvet-beg Bašagić“

U ovoj mjesnoj zajednici izgrađen je lijep sportski poligon, koji je lociran pored područne škole „Dr.Safvet-beg Bašagić“. Sama lokacija je veoma kvalitetna samim tim što ga koriste prije svega učenici a i udaljen je od stambenih objekata. Pored sportskog poligona u ovoj mjesnoj zajednici ima i nogometni stadion „Jezero“ jedan od najkvalitetnijih stadiona na području Grada Gradačac.



Mjesna zajednica Zelinja Donja – Osnovna škola „Musa Ćazim Ćatić“

U krugu škole nalazi se prilično kvalitetan sportski poligon koji je i osvijetljen, čime su stvoreni uslovi za veće korištenje. Veoma pogodna lokacija i za proširenje poligona čime bi se stvorile mogućnosti bavljenja i ostalim sportovima. Također, u ovoj MZ postoji i nogometni stadion, koji mještani dobro održavaju a u 2019. godini grad Gradačac je sa **20.000,00 KM** učestvovao u njegovoj obnovi i izgradnji.



Mjesna zajednica Zelinja Srednja-pored društvenog doma

Učešćem mještana i općine Gradačac izgrađen je kvalitetan sportski poligon koji je ograđen i osvijetljen i koji pruža dobre mogućnosti mještanima ove mjesne zajednice za bavljenje sportom i rekreacijom.



Mjesna zajednica Požarike

U ovoj MZ se nalazi sportski poligon, za koji je iz sredstava općine Gradačac 2014. godine izdvojeno **29.978,00 KM**. Sportski poligon je osvijetljen i ograđen i koristi ga omladina i odrasli za svoje sportske aktivnosti. Odmah pored terena za mali nogomet i rukomet nalazi se i odbojkaški teren.



Mjesna zajednica Jasenica-područna škola „Musa Ćazim Ćatić“

U ovoj mjesnoj zajednici postoji ograđeno travnato igralište dimenzija rukometnog, odnosno malonogometnog igrališta. Teren nije baš u najboljem stanju, ne održava se redovno. Potrebno bi ga bilo asfaltirati ili poravnati i obilježiti, osvijetliti, te bolje održavati.



Mjesna zajednica Kerep

Godine 2013. sredstvima iz budžeta općine Gradačac u iznosu od **57.840,88 KM** u ovoj mjesnoj zajednici izgrađen je odličan sportski poligon. Osvijetljen je, ograđen i posjeduje sve uslove za kvalitetno izvođenje nastave kao i za rekreaciju i bavljenje sportom ostalih mještana, kako omladine, tako i odraslih.



Mjesna zajednica Međida Donja- Osnovna škola „Edhem Mulabdić“

Kvalitetan sportski poligon koji je osvijetljen i ograđen. Dobro je što je osvijetljen tako da se može koristiti i u večernjim satima. Neposredno uz ovaj poligon gradi se i sportska dvorana koja će služiti učenicima za odvijanje nastave kao i mještanima ovog područja za bavljenje sportom, organizovanje turnira itd. Pored sportskog poligona u ovoj MZ se nalazi i kvalitetan nogometni stadion „Mujo Biberkić“ koji je dobro uređen i redovno održavan.



Mjesna zajednica Međida Gornja-područna škola „Edhem Mulabdić“

Kvalitetan sportski poligon koji mnogo znači za omladinu i mještane ove mjesne zajednice s obzirom da nemaju teren za veliki nogomet. Poligon je osvijetljen, što pruža mogućnost korištenja istog u večernjim satima. Potrebno bi bilo postaviti bolje koševе kao i golove.



Mjesna zajednica Međida Srednja

Jedna od rijetkih mjesnih zajednica koja još nema riješeno ni pitanje same lokacije poligona odnosno nabavke zemljišta a u ovoj MZ nema ni nogometnog stadiona.

Mjesna zajednica Jelovče Selo

Nogometni stadion u ovoj MZ je u jako dobrom stanju. Travnjak, kao i službene prostorije se redovno održavaju te se time omogućava kvalitetno treniranje i odigravanje utakmica za lokalni nogometni klub „Željezničar“. Manji sportski poligon se nalazi kod škole i u solidnom je stanju. Potrebno bi ga bilo proširiti, postaviti reflektore, te iscrtati linije na njemu.



Mjesna zajednica Biberovo Polje

Uz samu područnu školu 2016. godine, prema propisanim dimenzijama izgrađen je odličan sportski poligon koji je ograđen i osvijetljen. Za izgradnju ovog poligona općina je izdvojila **38.033,54 KM**. Uz ovaj sportski poligon nalazi se i izuzetno lijep i redovno održavan nogometni stadion koji je u odličnom stanju.



Mjesna zajednica Vučkovci

U ovoj mjesnoj zajednici se nalazi nogometni stadion sa jako dobro uređenom travom, klupskim prostorijama, kao i ogradom. Jedan je od kvalitetnijih stadion na području Grada Gradačac. Odmah pored stadiona nalazi se sportski poligon koji je u solidnom stanju. Asfaltiran je, osvijetljen i ograđen, ali su dotrajali koševi i golovi i potrebno ih je zamijeniti.



Mjesna zajednica Lukavac Gornji

Uz područnu školu „Hasan Kikić“ do prije četiri godine postojao je sportski poligon koji je bio u veoma lošem stanju. Godine 2016., sredstvima općine Gradačac u iznosu od **30.600,48 KM** u ovoj mjesnoj zajednici izgrađen je jako lijep sportski poligon, koji je ograđen i osvijetljen.



Mjesna zajednica Sibovac-područna škola“Safvet-beg Bašagić“

Godine 2013. budžetskim finansiranjem u iznosu od **38.495,81 KM** izgrađen je odličan sportski poligon. Ograđen je i osvijetljen, čime su stečeni uslovi za njegovo korištenje i u večernjim satima. U ovom sportskom kompleksu, pored pomenutog sportskog poligona nalaze se još i dva nogometna terena koja su u odličnom stanju kao i dječje igralište za najmlađe.



Mjesna zajednica Srnice Donje

Obzirom da u ovoj mjesnoj zajednici živi mali broj mještana svi javni objekti su u veoma lošem stanju. Nogometni teren na stadionu je zarastao, oronuo i potrebna su velika sredstava da bi se sve to saniralo. Uz osnovnu školu je sportski poligon koji je potrebno proširiti, presvući novim slojem asfalta, ograditi i osvijetliti.



Mjesna zajednica Srnice Gornje

U 2016. godini, sredstvima iz budžeta općine Gradačac u iznosu od **43.972,86 KM** u ovoj MZ zajednici je izgrađen sportski poligon. Poligon je i danas u odličnom stanju, osvijetljen je kao i ograđen, ali bi trebao redovnije da se održava.



Mjesna zajednica Hrgovi Donji

U neposrednoj blizini lokalne crkve 2014. godine finansiranjem općine Gradačac u iznosu od **30.010,50 KM** izgrađen je sportski poligon. Osvijetljen je, ali ga je potrebno ograditi. Osim ovog, u ovoj MZ postoji i jako lijep nogometni teren, te jedan manji sportski teren, dimenzija rukometnog igrališta, sa travnatom podlogom.



Mjesna zajednica Mionica II

U mjesnoj zajednici Mionica II se nalazi jedan od najkvalitetnijih i najljepših nogometnih stadiona na području Grada Gradačac. Posjeduje prostorije za seniore i zasebni prostor za mlađe selekcije, veoma kvalitetan teren i tribine. Pored toga postoje i dva sportska poligona. Jedan se nalazi pored osnovne škole a drugi pored društvenog doma, koji je izgrađen 2016. godine, sredstvima iz budžeta općine Gradačac u iznosu od **28.046,53 KM**. Potrebno ga je još osvijetliti i ograditi.



Mjesna zajednica Mionica I

U ovoj mjesnoj zajednici je izgrađen kvalitetan sportski poligon pored društvenog doma i u blizini područne škole. U toku 2014.godine urađena je nova ograda na poligonu i rasvjeta. Pored sportskog poligona nalazi se i jedno od najljepših dječjih igrališta na području Gradačca. Problem nogometnog stadiona usljed klizišta, kojeg su mještani ove MZ imali dugo godina se rješava. Naime, 2019. godine je započelo izvođenje radova na izgradnji stadiona, a samim time i rješavanju ovog problema. Grad Gradačac je izdvojio **218.000,00 KM** za ovu namjenu.



Mjesna zajednica Bukva

U sklopu OŠ „Dr.Safvet-beg Bašagić“ nalazi se jedan manji sportski poligon. U dobrom je stanju, a trebalo bi ga proširiti, obilježiti linije na njemu, osvijetliti i ograditi. Golovi i koševi na ovom poligonu su u dobrom stanju.



Mjesna zajednica Centar-Gradačac

U mjesnoj zajednici Centar-Gradačac nalazi sportski poligon, odnosno kompleks za male sportove“ Luke“. Ovaj kompleks sačinjavaju : igralište za mali nogomet i rukomet, igralište za košarku, teren za odbojku, teren za mini-rukomet, odnosno mini-nogomet, kao i ograđeni dječji poligon, a u neposrednoj blizini, u sklopu gradskog parka, nalazi se i dječje igralište sa prigodnim sadržajem za najmlađu populaciju (tobogani, klackalice i td.)

Rekonstrukcija i dogradnja kompletnog sportskog kompleksa je rađena u dvije faze. Prva je rađena 2015. godine, gdje je općina iz budžeta izdvojila **97.827,00 KM**. Druga faza rekonstrukcije je izvršena 2017. godine, za šta je izdvojeno također iz budžeta općine Gradačac **204.418,05 KM**. Ovaj sportski poligon, odnosno kompleks, sasvim sigurno spada u najljepše i najkvalitetnije u Bosni i Hercegovini. U ovoj MZ ima i kvalitetan mali poligon sa rekvizitima za igru djece manjeg uzrasta u Ulici Šehida u Gradačcu.





Teren za odbojku na pijesku na jezeru „Hazna“

U kompleksu jezera „Hazna“ nalazi se teren za odbojku na pijesku koji građani mogu koristiti tokom cijele sezone lijepih dana. Teren ima i manje tribine koje su dotrajale i potrebno ih je sanirati ili zamijeniti novim, a i sam teren je zapušten i u lošem stanju. Ne održava se redovno i primjetno je da fali veća količina pijeska na istom.



Teren za odbojku na pijesku na jezeru „Vidara“

U sklopu jezera „Vidara“ nalazi se teren za odbojku na pijesku koji se zadnjih nekoliko godina intenzivno koristi, uglavnom od strane pretežno mlađe populacije, u periodu vremenskih uslova koji to dozvoljavaju. Na ovom terenu se povremeno organizuju i turniri u odbojci na pijesku. Teren je u odličnom stanju, ograđen je, pijeska ima dovoljno i redovno se održava.



Stanje po pitanju vanjskih sportskih terena na području grada Gradačac je jako dobro jer je skoro kompletno područje Grada pokriveno sportskim terenima. Od 36 mjesnih zajednica njih 27 posjeduje sportski poligon ili nogometno igralište ili oboje, a pojedine mjesne zajednice imaju i više od dva sportska terena. Preostalih 9 mjesnih zajednica, koje nemaju nikakav vanjski teren, uglavnom je to iz razloga što nemaju predviđenu lokaciju na kojoj bi se mogao izgraditi sportski teren, odnosno zemljište je u privatnom vlasništvu ili jednostavno u određenoj mjesnoj zajednici nema interesa za izgradnju sportskog terena, pretežno zbog malog broja stanovnika te MZ, koju uglavnom čini starija populacija. Također, još jedan od razloga zašto u pojedinim mjesnim zajednicama nema sportski teren je taj što su mjesne zajednice, posebno u užem jezgru grada, jako blizu jedna drugoj, te jedan sportski teren zadovoljava potrebe dvije, tri i više mjesnih zajednica.

Kada su u pitanju fiskulturne sale i sportske dvorane, na području grada Gradačac ima ukupno sedam sportskih sala, a još jedna je trenutno u izgradnji to jest školska sala u Međidi Donjoj.

Sportske dvorane pri školama su : MZ Bukva u sklopu Osnovne škole „Dr. Safvet-beg Bašagić“, MZ Srnice Donje pri OŠ „Mehmed-beg Kapetanović Ljubušak“, MZ Centar u sklopu OŠ „Ivan Goran Kovačić“, MZ Zelinja Donja u sklopu OŠ „Musa Ćazim Ćatić“, MZ Varoš u sklopu Mješovite srednje škole „Hasan Kikić“, MZ Mionica II-Kamberi, sportska dvorana u sklopu škole „Hamdija Kreševljeković“, koja je nedavno izgrađena i koja se može, zbog svojih dimenzija i odličnih uslova, koristiti i za zvanične utakmice dvoranskih sportova na području Grada Gradačac. Gradska sportska dvorana, koja pripada MZ Centar, najveća je sportska dvorana u Gradačcu ali u zadnjih nekoliko godina zbog gotovo nikakvog ulaganja i održavanja je u jako lošem stanju. Gotovo sve u ovoj sportskoj dvorani je potrebno renovirati i promijeniti to jest podlogu, golove, svlačionice, koševе, riješiti pitanje grijanja, rasvjetu potpuno promijeniti i još mnogo drugih stvari.

Cijena korištenja dvorane za trening i rekreaciju u vremenu od 1 (jedan) sat je 50 KM + PDV.

Cijena korištenja dvorane za vrijeme odigravanja utakmica je:

a) košarka ,rukomet, odbojka – oko 2,5 sata.....400,00 KM + PDV

b) mali fudbal – oko 1,5 sat.....200,00 KM + PDV

Korištenje dvorane za mlađe selekcije – 1 (jedan) sat košta 35,00 KM + PDV a odigravanje utakmice mlađih selekcija (u dnevnim satima) košta 150,00 KM + PDV.

d) Obezbjedenje sredstava za ostvarivanje gradskog sportskog programa

Sredstva za ostvarivanje javnog interesa u oblasti sporta na području Grada obezbjeđuju se aktivnostima klubova, putem donacija i sponzorstva od strane firmi i preduzeća, te obezbjeđenjem sredstava iz budžeta Grada. Sredstva koja su se u proteklom periodu izdvajala za sport iz budžeta grada Gradačac su zadovoljavajuća, iako bi to moglo i mora biti na još višem nivou da bi se postizali još bolji sportski rezultati.

U 2019. godini iz Budžeta Grada za sport su utrošena sredstva u iznosu od to na sljedeći način:

1. NK „Zvijezda-Gradačac“ Gradačac.....	214.000,00 KM
2. RK „Gradačac 1954“ Gradačac.....	50.000,00 KM
3. OK „Kula-Gradačac“ Gradačac.....	55.000,00 KM
4. NK „Omladinac“ Mionica II.....	6.200,00 KM
5. FK „Bosna“ Mionica III.....	13.000,00 KM
6. NK „Jedinstvo“ Vučkovci.....	5.400,00 KM
7. OFK „Vida“ Vida I.....	5.400,00 KM
8. FK „Mladost“ Sibovac.....	7.000,00 KM
9. FK „Sloboda“ Kerep.....	5.400,00 KM
10. NK „Željezničar“ Jelovče Selo.....	5.400,00 KM
11. OFK „Mionica 85“ Mionica I.....	3.800,00 KM
12. NK „Trebava“ Zelinja Donja.....	4.200,00 KM
13. NK „Biberovo Polje“ Biberovo Polje.....	5.400,00 KM
14. NK „12. decembar“ Rajska.....	5.400,00 KM
15. OFK „Međida Donja“ Međida Donja.....	3.700,00 KM
16. Gradski nogometni savez.....	1.700,00 KM
17. RK „Speed“ Gradačac.....	5.000,00 KM
18. Realizacija Programa i funkcionisanje Sportskog saveza.....	29.000,00 KM
19. KIK „Zmaj“ Gradačac	35.000,00 KM
20. KBS «Zmaj».....	2.680,00 KM
21. Streljački klub «Centar».....	2.000,00 KM
22. Kung Fu Wu Shu «Pesnica od Bosne»	5.000,00 KM
23. Škola nogometa «Tempo».....	400,00 KM

PRIJEDLOG SISTEMSKIH MJERA

U narednom periodu neophodno je provođenje određenih sistemskih mjera koje će svakako uticati na poboljšanje uslova za bavljenje sportom i postizanja još boljih sportskih rezultata svih sportaša našeg grada. U tom smislu potrebno je:

1. Nastaviti sa realizacijom ranije donijete odluke oko obezbjeđenja sredstava za plaćanje kotizacije i troškova službenih lica na utakmicama nogometnim klubovima sa područja grada Gradačac.
2. Stadion „Banja-Ilidža“ staviti na raspolaganje ne samo nogometnom klubu „Zvijezda“, nego i ostalim sportskim klubovima, te predvidjeti da se na stadionu mogu održavati i ostali sadržaji vezani za masovni i školski sport, kao i za fizičke pripreme sportista iz ostalih sportova, a i za potrebe rekreacije građana.
3. Klubovima koji koriste sportsku dvoranu i za potrebe školskog sporta obezbijediti dovoljan broj sati za trenažni proces i takmičenje.
4. Što hitnije riješiti pitanje gradske sportske dvorane ili planirati graditi novu, jer postojeća je u jako lošem stanju, te jedva zadovoljava minimum uslova za održavanje zvaničnih utakmica za dvoranske sportove. Pitanje gradske dvorane se ne tiče samo sportskih klubova, nego i rekreativaca, koji je koriste u velikoj mjeri za razne sportsko-rekreacione aktivnosti.
5. Započeti aktivnosti na izgradnji moderne atletske staze na gradskom stadionu u Gradačcu u saradnji sa resornim ministarstvom u Vladi TK, kao i pokušati naći rješenje za izgradnju staze za trkače u prirodi, kao i biciklističke staze, jer trčanje i biciklizam kao vid rekreacije u zadnjih nekoliko godina postaje trend u svijetu a sve više se upražnjava i kod nas.
6. Pomoći onim klubovima koji vrše renoviranje stadiona i sportskih poligona po mjesnim zajednicama kako bi se stvorili povoljni uslovi za trenažni proces i bavljenje sportom uopšte.
7. Sagledati koje su mogućnosti da se izgradi bazen na području grada Gradačac, kao i pokušati riješiti problem zagađenosti vode u našim jezerima „Hazna“ i „Vidara“, kako bismo reaktivirali klubove koji se bave sportovima na vodi ili potakli osnivanje novih, te kako bismo rekreativcima omogućili plivanje i ostale sportove na vodi kao još jedan vid sportske rekreacije u našem gradu.
8. Izgraditi fiskulturne sale Osnovne škole “Hasan Kikić“ i Gimnazije „Mustafa Novalić“ kao i sportski poligon MSS „Hasan Kikić“.
9. Pripremiti projekat stručnog osposobljavanja trenerskog kadra za sve zainteresovane i sportske trenere koji nemaju potrebne licence i stručne kvalitete za rad u sportu.
10. Donijeti dugoročni Program razvoja sporta na području grada Gradačac.

Obrađivač

Služba za društvene djelatnosti i BiZ

Predlagač

Gradonačelnik Edis Dervišagić